





3 1761 06765930 0

K


I5994







Inscriptus catalogo Librorum
(Geo. Berényi humani
tatis in anu. 2^{da} auditoris
A. 1778



E L E M E N T A
IVRIS NATVRALIS

THE
REPUBLICAN

INSTITVTIO
ELEMENTORVM
IVRIS NATVRALIS
IN
VSVM GYMNASIORVM
ET
SCHOLARVM GRAMMATICARVM
PER
REGNUM HVNGARIAE
ET
PROVINCIAS
EIDEM ADNEXAS.



B V D AE,


TYPIS REGIAE VNIVERSITATIS
ANNO M. D. CC. LXXVIII.

Prostant Budae, et Tyrnauiæ, a 4. xr.

K

I5994





PROEMIUM.

§. I.

*Homo in eligendo bono, & malo saepe
labitur, et quare?*

Ita homo a natura factus est, ut nihil adpetere soleat, nisi, quod sibi tamquam bonum aliquod cogitat; nihil auersari, nisi opinione mali. Constat vero experientia multorum, saepe nos cogitatione boni, malitiae decipi, bonumque existimare, quod reipsa malum est; malum contra reputare, quod est bonum: eoque errore frequenter euenire, ut voluntas specie boni, aut mali impulsam in alia omnia feratur, quam in qua illam natura sua ferri oportebat.

§ 2.

Quare homini necessaria lex?

Ut ne igitur ad veram naturae felicitatem homo sine sibi a DEO praestituto excideret,

A

ne-

necessaria illi est, non modo via quaedam, ac ratio certa, qua id, quod vere bonum est, vel malum, ab eo, quod adparet tantum, discernere valeat; verum etiam, norma, seu regula, per quam ad id, quod novit, bonum faciendum, malum contra vitandum dirigatur.

§ 3.

Quid lex naturalis?

Vtrumque illi *leges naturales* suo modo praestare possunt: neque enim iud illae sunt, quam insitae in natura hominis ab ipso Creatore, et per rectum rationis usum promulgatae regulae, quae non modo, quid bonum nobis, quidue malum sit, perspicue indicant; sed etiam ad illud quidem faciendum, hoc autem fugiendum necessitate quaedam adstringunt.

§ 4.

Quid Ius Naturale? et quae eius utilitas?

In his legibus exponendis versatur Philosophiae moralis pars illa, quae *Iuris Naturae*
no-

nomine satis nota est. Huius proinde vsum, necessitatem, ac praestantiam facile quisque intelliget, si cognoverit, nullam illi rem aliam esse propositam, quam vitae praesentis naturalem, ac veram beatitatem, quae nisi veris bonis conlectandis, verisque malis vitandis; id est, virtute studiose colenda, nulla esse omnino potest.

§ 5.

Quid officium, et quotuplex?

Quidquid Ius Naturae faciendum, vel omittendum docet, id omne *officium* dicitur. Est autem officiorum naturae partitio commodissima, in ea, quae quisque *Deo*, tum, quae *sibi ipsi*, tandem, quae *aliis* debet. Quae aliis debemus officia, bipartita sunt: alia enim *iure perfecto* iis debentur: et vi a nobis etiam inuitis exigere possunt, quae officia *iustitiae* dicuntur: alia proficiscuntur *ex charitate*, quae coactioni subiecta non est, debenturque *iure imperfecto*, et ob id officia *humanitatis*, ac *beneficentiae* adpellari solent.

Ita ad humanitatem, et charitatem pertinet, egenti quum possis auxilium praebere; sed

rem depositam, Domino quum repetit, restituere, exigit iustitia,

§ 6.

Quid officium absolutum, et hypothet?

Officiorum porro iustitiae duo sunt genera: *absoluta*, et *hypothetica*: *absoluta* sunt, quae naturali lege ita praecipuntur, ut nullum factum, vel institutum humanum supponant; cuiusmodi sunt de non laedendis aliis: *Officia hypothetica* sunt, quae nisi positis quibusdam hominum institutis, locum non habent. Huius generis officia sunt, quae ex iure Domini, pactorum, societatis proficiuntur.

§. 7.

Partitio huius opusculi.

Itaque Iuris Naturalis institutio ut iusto quodam ordine procedat, primum quidem, quae quisque DEO debeat, docebimus: tum, quae sibi ipsi, aliisque singulis; postremo, quae societati humanae. Ita vero in his tradendis officiis versabimur, ut capita magis officiorum indicentur, quo nimirum intelligamus, quemadmodum ex lege naturae vitam nos agere deceat, quam ut
di-



disciplina rerum varietate perampla, pagellis aliquot comprehendatur.

CAPVT PRIMVM

DE OFFICIIS ERGA DEVM.

§. 8.

Quodnam est supremum hominis erga Deum officium?

Rerum creatarum omnium finem supremum in diuinarum perfectionum manifestatione situm esse adcurata earum, totiusque naturae contemplatio luculentissime commonstrat. Primum igitur, ac praecipuum, quod homini natura imposuit, officium illud est, quod *in Supremi Numinis gloria illustranda, veroque eius cultu versatur.*

§. 9.

Quid est cultus Dei, et quotuplex?

Cultus DEI complectitur actiones, ad quas suscipiendas, ponendasque diuinarum



perfectionum cognitione, ac sensu impellimur. Quare Quum actiones huiusmodi, quemadmodum aliae omnes, quae quidem libere peraguntur, vel ab animi solius, vel a corporis simul viribus pendeant, Diuini cultus genera duo recte statuuntur: *Interni* scilicet, atque *externi*: quorum ille sine hoc quidem; hic vero sine illo verus esse cultus, dicique nullo modo potest.

§. 10.

*Cultus diuini interni officium est I^{mo}
Deum cognoscere.*

Interni cultus princeps officium est: DEUM cognoscere: deque illo recte sentire ei, potentiam suam, bonitatem, sapientiam reddere, neque quidquam illi tribuere, quod cum his, aut coeteris eius perfectionibus componi nequeat. Quocirca vitandus est omnis, verae de DEO cognitioni aduersus error, vitanda *superstitio*, quae ex ignorata DEI natura eiusmodi actionibus beneuolentiam eius demereri studet, quae tantum abest, ut gratiae illi, acceptaeque esse possint, ut etiam necessario displiceant

§. 11.

§. II.

2^{do} *Eum amare.*

Certa vero, ac *viua* perfectionum diuinarum cognitio fieri non potest, quin tenerimum Summi Numinis amorem in animis mortalium concitet. Sunt haec duo ita inter se natura coniuncta, vt alterum ex altero consequatur. Et vero sunt hominibus permultae DEUM super omnia caulae amandi: nam et ipse in se bonus est; immo summe bonus: bonum vnicum, in cuius perfruitione beatus homo esse potest; et nos amore plus, quam paterno prosequitur, quod ex tot eius, ac tantis, quae in nos quotidie confert, beneficiis nemo nisi ingratissimus nescire potest.

§. 12.

3^{tio} *Reuereri, ac more filiorum timere
tamquam Patrem.*

Habet autem hoc omnis amans, vt sollicite caueat, ne quidquam a se admittatur, quod ei, quem amat, iure possit displicere. Sollicitudo haec, quoniam ex amore nascitur, *reuerentia*, seu *timor filialis* aptissime dicitur.



Itaque DEO, ut amor, ita et reuerentia, et coniunctus cum amore timor a nobis natura debetur. Qui DEUM timet, non quia veretur ut Patrem sui amantem: sed quia reformidat ut Dominum scelerum suorum vindicem, timet *seruiliter*; qui quidem timor, si a coeteris reuerentiae Supremo Numini exhibendae motibus seiunctus non est, nec iniustus est, nec sine magna vitae socialis utilitate, cuius magnopere interest, poenarum saltem metu ad officium cogi eos, quos aequi, honestique amor non continet.

§. 13.

4^{to} Eidem obsequi.

Nihilominus fatendum est, laudabilius, et divina Maiestate dignius *obsequii* genus illud esse, quod ex timore filiali proficiscitur, et cum amore coniunctum est: nimirum digna DEO obedientia illa demum est, quae prompte, ac lubenter facimus, quae is fieri a nobis vult, et omittimus, quae non vult, idque solius diuinæ voluntatis contemplatione. Quare duo complectitur obsequium hoc erga DEUM officium; legum scilicet diuinarum diligentem, quoad status cuiusque, et inge-



ingenium patitur inquisitionem ; tum earum ipsarum legum amorem , vitamque secundum eas institutam. Esse autem DEO obediendum magis , quam hominibus , ex eo fit perspicuum , quod rerum , hominumque supremus sit Dominus , cui Reges ipsi omnes reuerenter obediant , necesse est.

§. 14.

5^{to}. *Et propter Deum etiam legitimis Superioribus.*

Verumtamen obsequii , quod DEO debetur , pars est non postrema , obsequium , quod Regibus , aliisque legitimis superioribus debemus ; *non est enim potestas nisi a Deo* , vt Apostolus docuit. Et , qui in terris imperium exercent Reges , ac Principes , diuino id consilio , diuinoque iussu exercent : ex quo fit , vt desertores officii sui , diuinaeque legis contemptores sint habendi , quicunque obedire detrectant his , quos legitimo in nos imperii iure gaudere DEVS ipse voluit.



§. 15.

6^{to} *Etiam in his, quae sola nobis reuelatione constant.*

Obsequium autem, quod DEO deberi ratio docet, non ad naturae tantum praecepta, veritatesque naturae lumine cognitae pertinet; verum ad omnes, tam veritates etiam eas, quae rationis humanae vires sublimitate sua excedunt, quam mandata, etsi solius reuelationis diuinæ beneficio nobis innotuissent: neque enim obsequens DEO dici quisquam potest, qui, quod docuisse illum nouimus, ac praecepisse, etiam si ratio id minus adsequatur, non certissimum habet, totoque animo amplectendum sibi, exequendumque non putet. Nam ut omnis hac in re dubitatio; ita contemptio cuiuscunque a DEO propositae legis, non potest non cum summa diuinitatis iniuria esse coniuncta. Ex quo admirari licet impudentiam hominum, qui, dum reuelationis diuinæ aperte prae se contemptum ferunt, suum in naturalem religionem studium verbose iactant, quasi non ipsa esset ratio, quae reuelationi tota mente, toto corde adhaerere praecipiat,



§. 16.

7^{mo} Sperare in DEVM

Quamquam vero obedire nos DEO oporteat in omnibus solius diuinæ voluntatis contemplatione; habet tamen promptum, et constans in seruitio DEI obsequium, propositam sibi spem certam *proemii*, vt inobedientia *poenae*: Est enim profecto sapientiae, ac prouidentiae, qua totam hanc rerum vniuersitatem gubernat DEVS, proprium, sicut remunerari virtutem, ita punire vitia. Nec si differat interdum poenam DEVS, aut prauos homines donare bonis vitae praesentis videatur, idcirco abiicienda nobis spes est. *Consuescunt enim, vt ait elegantissime IULIVS CAESAR, Dii immortales, quo grauius homines ex commutatione rerum doleant, quos pro scelere eorum ulcisci velint his secundiores interdum res, et diuturnam impunitatem concedere. Libro I. de bello Gallico cap. 14.*

§. 17.

8^{uo} In ipso fiduciam collocare.

Fiduciam quoque in DEO collocare, hominis pii officium est. Quum enim omnia
ille



ille explorata teneat, quae in hoc mundo sunt, et aguntur: quum ea, quibus homines indigemus, quibusue vrgemur, bona, et mala cuncta illi perspecta sint: quum porro res nulla sit, quae, quomodo effici possit, ipse nesciat, aut cui efficiendae potentia eius non sufficiat, quum denique res a se creatas amet, ac beneficus sit adeo, vt nullum verum bonum sit, quod ab eius munificentia expectare non liceat, quidquamne magis certum cuiquam esse debet, quam sit hoc: *posse* DEVM scilicet nos beatos reddere, ac etiam *velle*, omninoque felices nos sub tutela eius, ac prouidentia fore, neque defuturum nobis vnquam quidquam earum rerum, quae ad felicem, vereque beatam vitam pertinent.

§. 18.

9^{no} *Eius voluntati adquiescere.*

Cum fiducia huiusmodi necessario coniuncta est, *adquiescentia* in voluntate diuina, qua fit, vt aequo animo feramus omnia, quaecunque nobis obueniunt: nam, quia persuasissimum nobis esse debet, nihil praeter DEI voluntatem nobis accidere; certum autem sit, nihil ab eo permissum iri vnquam, quo vere infelices, ac miseri efficiamur, quid est

est, cur imbutus hac cogitatione animus fortunae ludos magnopere reformidet? atque hinc illa est piorum in aduersis magnitudo animi, et tranquillitas, quam non immerito Ethnicorum etiam sapientes in magna felicitatis parte reponebant.

§. 19.

10mo Ex quo nascitur officium ad preces.

E fiducia in DEO *preces* nascuntur. Sunt hae desideria rerum ad salutem nostram pertinentium vel animi solius, vel expressa verbis: Quoniam vero nullae DEO preces gratae sint, nisi quae cum spe, ac fiducia auxilii diuini coniunctae sunt, magnopere cauendum est nobis: ne quid ab eo petamus, quod aut nociturum est nobis, aut DEVS salua sapientia, bonitate, iustitia tribuere non potest. Et quia per saepe, quid nobis vere prosit, quid diuinis perfectionibus sit consentaneum, non satis intelligimus; sapienter illi, ac pie faciunt, qui nihil a DEO, neque petunt, neque expectant, nisi quod ipse profuturum sibi iudicauerit; quique semper IUVENALIS illud in animo habent.

Per-



*Permittas ipsis Numinibus expendere, quid
Conueniat nobis, rebusque sit utile nostris.
Nam pro iucundis aptissima quaeque da-
bunt DEI
Carior est illis homo, quam sibi.*

§. 20.

Quid cultus DEI externus, et qualis?

DEVM Opt. Max. non mente tantum, et animo; verum externis quoque actionibus colendum esse natura ipsa, et ratio penitus persuadent. Manifestare enim gloriam eius, id quod natura praecipit, qua tandem alia ratione poterimus, nisi id fiat per actus exteriores, diuinis perfectionibus consentaneos. Huiusmodi actibus cultus DEI externus constat, qui proinde veri nominis cultus esse non potest, nisi coniunctum habeat internum, a quo proficiscitur. Abest ergo a verae pietatis ratione, non modo *superstitio*, sed et *mechanismus*, et *simulatio pietatis*, quae tum existit, quando vel gloriae studio, vel utilitatis suae causa, vultu, gestuque pietatem mentiuntur vani homines, a qua eorum animus abest quam longissime.

§. 21.

§. 21.

Quae sunt externi cultus partes?

Exterioris autem diuini cultus officia haec sunt praecipua 1^{mo} exercitiis pietatis, quibus illa conseruatur, confirmatur, augetur, veluti legendis libris, et audiendis piis sermonibus, diligenter et assidue vacare. 2^{do} DEVM, ac verum illius cultum coram aliis sincere profiteri, quoties id diuina gloria deposcit: cui officio aduersatur et *pudor pietatis* et *religionis totius negatio*. 3^{io} alios ad cultum verae diuinitatis tam verbis cohortari, quam exemplo trahere. 4^{to} de DEO nunquam nisi cum summa reuerentia, ac modestia loqui; eius nomine ad res ludicras, ac turpes non abuti: nihilque, nec facere, nec dicere, ex quo suspicio cuiquam animi de DEO minus recte sentientis nasci possit. Huc etiam pertinet 5^{to} Diuini nominis celebratio, externaque supremi Numinis adoratio, quacum aduersa fronte *blasphemia*, & *idololatria* pugnat. 6^{to} *Supplicationes*, *preces*, *interpellationes*. 7^{mo} gratus aduersus DEVM verbis, factisque declaratus animus, aliaque huius generis, quae ex superioribus nullo negotio intelliguntur.

§. 22.


An etiam dies festi? ceremoniae? imagines?

Ad cultum externum etiam dies festi, et ceremoniae sacrae, atque imagines referuntur. Et *festi* quidem *dies* non ita sunt lege naturae instituti, ut, quibus temporibus, et quoties celebrandi sint, perspicue definit: hoc tamen ex his, quae dicta sunt, aperte cogitur, insignem eorum ad alendam, augendamque pietatem esse utilitatem. *Ceremoniae*, et *imagines* quoniam in id comparatae sint, ut rerum sacrarum, operum, ac beneficiorum DEI, exemplorumque pietatis singularium memoriam excitent, ac tueantur, adeo nihil rationi aduersum habent, ut etiam ab ea commendentur, si modo sint huiusmodi, ut hunc usum praestare commodè possint; caueaturque, ne homines sensuum amplius, quam par est, adsueta imperio, vniuersam, aut saltem praecipuam DEI colendi rationem in his sitam esse arbitrentur. Idem de hymnis in laudem DEI decantandis dici potest.

§. 23.

*Quid religio naturalis, et an sufficiens
ad beatitudinem?*

Atque haec *religionis naturalis* praecipua sunt capita: quam esse veram, ac in se bonam religionem negari quidem absque iniuria in DEVM non potest; sed tamen ad completam vitae etiam huius beatitudinem, felicitatemque comparandam natura sibi relicta minime sufficit: Quo magis agnoscenda est nobis religionis Christianae praestantia, quae, dum ignotum naturae modum commissa scelera expiandi suppeditat; dum conscientiae remorsibus medetur; dum imperare rationem: sensus contra servire cogit, egenti naturae ita succurrit, ut nihil praetermittat, quod ad recte, beateque viuendum pertineat.





CAPVT SECVNDVM

DE OFFICIIS HOMINIS ERGA SE IPSVM.

§. 24.

Officia , quae sibi ipsi homo debet, quoduplicia?

Officiorum, quae sibi quisque debet, triplex genus est. *Primum* eorum, quae ad MENTEM, ANIMVMQVE: *alterum*, quae ad CORPVS: *tertium*, quae ad statum externum pertinent. Insunt autem omnia in hac lege: *perfice te ipsum, ac statum tuum.*

§. 25.

Excolenda est mens.

Sed mentis, animique cultura in primis commendata cuique nostrum esse debet. Excolitur vero animus, dum facultates illae perficiuntur, quas natura menti attribuit. *Intellectus* autem, et *rationis* praecipua cura habenda est; nam quia rationis solius beneficio, ac vi, quid in quaque re verum sit,

fit, falsumque intelligimus: quid bonum, et malum, quid honestum, ac turpe, iudicamus: quid ex omni re, tamquam ex sua causa, futurum sit, prospicimus: negligens profecto felicitatis propriae sic oportet, et ipsa prope indignus humanitate, qui officium tam necessarium ignave deserit.

§. 26.

Quare?

Quomodo enim potest cuiquam ab erroribus cautum esse, nisi quid in vnaquaque re verum sit, quid falsum perspiciat? Et hoc ipsum, qui tandem fieri potest, neglecto omni, contemptoque rationis, atque intelligentiae cultu? cauendos autem esse errores, tamquam pestes, maxime illos, qui ad bonum, et malum, iustum, et iniustum, honestum ac turpe discernendum pertinent: potestne quisquam dubitare, nisi, si quis in animum inducat, nullam huiusmodi erroribus in vita humana, ac moribus vim esse? quidquod ipsa nos insita a natura veri videndi cupiditas ad hanc mentis culturam impellere debeat?

§. 27.

Excolenda voluntas, et quomodo?

Proxima huic adiungenda est cura *voluntatis*, quae, dum se recte habet, verum tantum bonum consecretur, et a vero tantum malo declinat. Atqui hoc ipsum est, quod natura iubet, in cuius legibus studiose observandis virtus sita est. Cauendum est proinde *primum*, ut ne boni maliue inani obiecta specie decipi nos vnquam patiamur: *deinde*, ut voluntatem amore virtutis imbutam naturae legibus obsequi, non imperare asuefaciamus. Et quoniam nulla res ad voluntatem a virtutis studio auocandam magis valet, quam vehementiores illae animi commotiones, quas dicimus *affectus*; obiiicienda his est tamquam froenum *temperantia*, sine qua nulla esse vita beata potest.

§. 28.

Intuitu corporis proprii quae hominis officia?

Ita vero excolendus nobis est animus, ut corporis curam non deseramus. Huius
prae-

praecipuum bonum est *vita*, proximum *valetudo*, cui morbus, ut illi mors opponitur. Vtrique ergo, et vitae, & valetudini tuendae, conseruandaeque curam adhibere debemus; neque facere quidquam, quo vel mortem accelerari, vel valetudinem corporis, viresque atteri nouerimus. Fugienda quoque sunt omnia, vitae, morborumque temeraria pericula. Multo vero minus ipse sibi vim quisquam interet, deque statione sua decedet prius, quam iusserit is, a quo in ea positus est.

§. 29.

Quae ratione status externi?

Ad statum externum: quod tertium est genus officiorum, quae sibi quisque debet, honor, et bona fortunae referuntur. Verum honorem nihil adfert praeter virtutem; nihil veram ignominiam praeter vitium. Vt igitur hanc vitare in naturae positum officio est, et ut humili, abiectoque animo nihil esse solet vilius: ita qui in laudis, ac gloriae studio nihil spectat, nisi virtutem, eamque recte, iuste, honeste agendo quaerit, non simulatione virtutis, mendacique eius adsumta specie captat, non is ambitio-

B 3

sus,



sus, non superbus dicendus est, quippe, qui naturam ducem sequitur.

§. 30.

Quae Bona fortunae? et quae circa haec hominis officia?

Bona fortunae dicuntur omnia, quae ad victum, amictum, aliasque vitae, seu necessitates, seu commoditates pertinent: Qui rem familiarem tam angustam habent, ut etiam necessitati desit, *pauperes* sunt: *diuites*, quibus ultra commoditatem suppetit. Itaque paupertas, quoad fieri potest, fugienda est: quamquam careat vituperio, si culpa vacet. Eadem vero aequo ferenda animo. Diuitiae nec consectandae nimium, nec abii-ciendae, dum a fortuna offeruntur: augenda res familiaris, sed sine iniuria cuiusquam, sine avaritia: utendum illa frugaliter, et sine profusione, nam ut sumptus non necessarios non recidere vitium est, ita facere, quos necessitas vitae, et congruens cum ratione iucunditas desiderat, in virtute positum est.

§. 31.

*Cur homini cuique certum vitae genus
eligendum?*

Ex hac rerum quaerendarum necessitate, existit naturalis ad laborem obligatio. Huic officio defunt, qui nulli se vitae generi addicentes, otio vitam transigunt, animam pro sale habentes, ne marcescant. Nam, etsi begniores tibi fortunam experto nihil eorum desit, quae ad commode, iucundeque viuendum desiderantur: deest tamen aliis, qui auxilium a te iure suo deposcunt. *Non enim nobis solum nati sumus, ut praeclare scribit CICERO, ortusque nostri Patria vindicat partem, partem parentes partem amici, atque ut placet Stoicis, quae in teris gignuntur ad usum hominum omnia creata, homines autem hominum causa esse generatos, ut ipsi inter se aliis alii prodesse possint. De offic. Libr. I^{mo} cap. 7^{mo}*



CAPVT TERTIVM

DE OFFICIIS HOMINIS ERGA ALIOS.

§. 32.

Officia aliis debita quotuplicis generis?

Officiorum, quae homo homini debet, duplex esse genus alibi dictum est: quaedam enim sine iniuria negari non possunt, horumque omnium quasi fons est *Iustitia*. Eius generis praecipua capita sunt: aliis, quod debeas, praestare: nocere nemini, et ne cui noceatur, quantum possis, impedire: Alia proficiscuntur ex *amore*, qui latius patet, neque id modo cauet, ne cui damnum adferat, sed, ut prosit etiam, connititur. Vtriusque generis causa est insitus nobis a natura societatis amor, et quasi cognatio quaedam naturalis inter omnes homines constituta, quae sine mutua huiusmodi officiorum commutatione salva diu esse non potest.

§. 33.

§. 33.

Quod est summum officium Iustitiae?

Iustitiae summum officium est *neminem laedere*. Quoniam vero principem in humanis bonis locum tenent ea, quae ad animum pertinent, cum primis cauendum erit, ne mens cuiusquam pravis, aut falsis opinionibus culpa nostra imbuatur, maxime de rebus ad mores, religionemue spectantibus, neue dictis, seu factis, aut exemplo nostro animus cuiusquam corrumpatur. Nullum sane magis perniciosum est iniuriae genus, nam et reparatur difficillime, et per omnem vitam serpit, quam in partem si quid peccatum a nobis erit, omni studio connitendum est, ut ad virtutem reducatur, qui eam contemnere exemplo nostro didicit.

§. 34.

Qua ratione corpus alterius laeditur?

Cauendum etiam est, ne corpori cuiusquam, aut membro, aut valetudini villo modo noceamus. In primis vero vita hominis homini sancta sit, necesse est. Quapropter etiam, dum iniuste impetitur, ipsaque



adeo in discrimine vita nostra est, omnia tentanda sunt prius, quo eam periculo subducamus, quam eo progrediamur, ut aduersarii nece vitam seruenius, nisi si omnis alia tuendae illius ratio intercepta fuerit.

§. 35.

Qua item fama, atque existimatio?

Non minus famae alterius, existimationique parcendum erit: aduersus quod officium multis modis committitur: detractatione, laudis alienae inuidia: conuitiis, factis, et ad contumeliam confectis, aut sparsis criminibus. Ut autem famae hominis consultum esse vult lex naturalis, ita si de ea quoquo modo a nobis detractum est, id totum praecipit reparari; quod quia ob multas, grauesque huius rei difficultates interdum ne fieri quidem potest, intelligitur, quantopere ab omnibus his iniuriae generibus cauere sibi vnusquisque debeat.

§. 36.

Qua demum Bona fortunae?

Quae rem alterius familiarem tueantur officia, complura sunt a natura constituta:



tuta: nam & auferre quidquam ex rebus alienis vi, aut clam, et fictis quemquam causis inducere, ut aliquid rerum suarum in nos transferat, aut alio quocunque modo efficere, quo minus id, quod sibi debetur, exigere, quodue suum est, defendere audeat, a iustitiae naturalis legibus pariter remotum est, aduersus quas et ille committit, qui ipse quidem non nocuit, sed damnum, quod potuit, non auertit.

§. 37.

Quid liceat in eum, qui prior laesit?

Adeo vero omnis laesio naturae recte constitutae aduersa est, ut nec, si quis nos prior laesit, eidem iustus esse locus queat. Laesit is prior, ac laedendo officii sui turpis effectus est desertor; an ne vero improbum alterius facinus ius mihi tribuet, non faciendi officium, quod ipse naturae auctor imposuit DEVS?

§. 38.

An etiam is laedit, qui damnum datum non reparat?

Laedit autem non is tantum, qui rebus alienis damnum infert; verum etiam ille,



ille, qui damnum, quod intulit, dum potest, non reparat. Quod quidem damni reparandi officium, non ad rei familiaris iniurias tantum; sed ad eas quoque pertinet, quibus animo, corpori, aut famae alienae detrimentum est illatum. Neque his modo, ut satis fiat, videndum est, verum iis etiam, ad quos iniuria, et damnum ex illa natum quo demum cunque modo redundavit.

§. 39.

Quid beneficentia?

Sed amoris, de quo diximus officia multo patent latius, quam iustitiae: haec enim, ne cui noceatur, solummodo praecipit; amor etiam prodesse vult omnibus, inimicis quoque; et prodesse vult non his modo rebus, quae nullo nostro incommodo praestantur aliis; sed etiam, quae cum molestia, et quadam rerum nostrarum diminutione coniunctae sunt, in quo sita est *beneficentia*

§. 40.

Quae dandorum beneficiorum regulae?

• In dandis beneficiis videndum est, ne beneficia dentur plus nocitura egentibus, quam

quam profutura : vt demus ita , ne ipsi egeamus : vt non vtilitatis propriae , ambitionisque causa , sed humanitatis solius respectu dentur : vt prompte , et cum hilaritate quadam etiam non rogati simus benefici : vt ne prodesse alteri cum alterius iniuria studeamus etc. Accipientis vero praecipuum officium in grato animo situm est , qui et amorem benefactoris complectitur , et accepti beneficii memoriam , studiumque referendae gratiae , siquid huiusmodi res deposcat , et vires patiantur.

CAPVT QVARTVM

DE OFFICIIS IN SERMONE , PROMISSIS , ET PACTIS.

§. 41.

Quodnam est praecipuum in sermone officium?

Societatis inter homines tam ineundae , quam conseruandae aptissimum vinculum est *sermo* ; neque enim sine communicatione sensuum animi mutua societas inter nos vlla esse

esse potest, neque haec sensorum communicatio vlla alia commodiore via peragi, quam sermone. Itaque sermonis haec vna causa est, vt cum aliis communicare sua quisque cogitata valeat. Quod ipsum quoniam fieri omnino nequeat, nisi verba vsurpentur iis cum notionibus, quas cum illis coniunxit vsus inter eos receptus, quibuscum loquimur; perspicuum est, abuti nos sermone, ac fallere illum, cui loquimur, quoties aliud ore gerimus, aliud premimus corde.

§. 42.

Quid simulatio, et dissimulatio? et quae circa haec officia?

Abest autem ab honestate, et iustitia omnis fallacia. Quare huius generis fraus vitanda, omnisque e societate humana tollenda est *simulatio* et *dissimulatio*, nisi quid huiusmodi inciderit, vt dissimulare, quod sentis animo, prosit tibi, alteriue, nemini vero noceat. Vt enim *taciturnitas* iure crimini vertitur, vbi alterius cuiusquam interest me loqui; ita simulare, vel dissimulare, quum de salute, ac bono alterius tuendo, promouendoque agitur, non modo viri boni non est,

est, sed est contra iustitiam: eamdemque ob causam fugiendae sunt *aequivocationes* omnes, *restrictionesque mentales*, quas astuta quaedam alios ludificandi solertia contra naturae simplicitatem in humanas societates inuexit. Nihil autem turpius, nihil minus dignum est homine, *mendaciis*, etiam si in rem nostram sint: nihil contra honestius, nihil amabilius, nihil in rem communem utilius, quam ut in tota vita; ita in omni sermone apertum esse, minimeque fallacem.

§. 43.

Taciturnitas quando praecepta, quando vetita?

Interdum etiam *tacere* in naturae officiis positum est. Nam, si qua nobis ab amico credita res est, quam nescire alios valde eius refert, nonne contra fidem silentii facit, qui eam temere effutit? idem in aliis omnibus rebus tenendum est, quae cunctis nota esse minime expedit, nisi quid eius rei nobis commissum esset, quod celatum magnum, vel proximo, vel societati, in qua viuimus, detrimentum esset adlaturum.

§. 44.

§. 44.

Modestia in sermone quae?

Vniuerse autem in omni sermone a criminationibus, calumniis, maledictis abstinendum est: de omnibus honorifice loquendum; sua cuique laus tribuenda: vitia aliena tegenda potius, quam aperienda, aut in partem meliorem interpretanda sunt: Cum primis vero cauendum est, nequid vnquam loquamur, quod sit ab honestate, pietateque alienum, quod animum indicet turpium rerum amantem, quod audientium mores corrumpere, vel animos malarum rerum cupidine imbuere possit. Quae, quo est gravior laesio, quoque difficilius emendatur, hoc maiore sollicitudine vitanda est.

§. 45.

Quid promissio? quid fides promissi?

Quemadmodum constans veri dicendi studium in humani generis felicitate promouenda vim permagnam habet ita, nisi sua inter homines promissis fides integra constiterit, parum illi consultum videbitur. *Fides* igitur in promissis sancta nobis sit oportet. Qui fidem, quam promittendo obstrinxit,
dum



dum potest, non exoluit, primum iniuriam facit illi, quem delusit, deinde humanae nocet societati, quae promissorum constantia, et datae fidei sanctitate potissimum sustentatur. Hoc autem ita par est intelligi, nisi, quod promissum est, cum honestate, vel iustitia pugnet, aut sit eiusmodi, ut in potestate nostra non sit; nam sicut, quae fieri omnino non possunt, ita, quae iuste, honesteque fieri non possunt, exigere pariter a natura alienum est.

§. 46.

Quid pactum, et cur servandum?

Mutua de re praestanda, et vtrinque acceptata promissio *pactum* vocatur. Pactorum itaque iura a iuribus promissionum pendent, et quae de his dicta sunt, ad illa rectissime transferuntur: quamobrem in omni pacto ante omnia tenendum est, nullum ab iis, quod iure valeat, iniri posse, qui, quod agunt, intelligere non possunt, veluti infantes, dementes, furiosi, etc. Deinde necessarium est, ut res, quae promittitur, nec vires nostras superet, nec legi alicui repugnet, nec iuri cuiusquam aduersetur. Pactum denique ipsum



ab omni metu saltem graui liberum sic oportet. *Error* quoque, et *dolus* abesse debent ; neque enim promissum recte dicitur , quod vis iniqua aut error, dolusue , nihil simile cogitanti extorsit. Cuncta haec pactorum genera vim ad obligandum nullam habent, neque illorum seruandorum vlla nobis a natura imposita est necessitas. Nam quod positiuo iure rescindi huiusmodi negotia oportere constitutum est, id quidem aliam, ac civilem rationem habet.

§. 47.

Quae in omni pacto vitanda ?

Sed pacti recte initi non minus sancta, quam promissi fides est, a qua proinde abesse debet omnis verborum ambiguitas, et fallacia, omnis callida, et ad eam eludendam malitiose conficta interpretatio: omnis quocunque colore inducta violatio. Sola rei, de qua pacti sunt, praestatione haec fides recte liberabitur; nisi vel mutua paciscentium consensione a pactione recedatur, vel gratiam huius faciat is, cuius res potissimum agitur. Vtrum horum si interuenerit seruandi pacti officio nos exolui apertum est.

CAPVT QVINTVM.

DE DOMINIO, ET OFFICIIS CVM EO CONNEXIS.

§. 48.

Pacta supponunt Dominium rerum.

Iam ad singulas pactio-
num species explicandas ut
progredieremur, ordo ipse
postulare videbatur. Quum
vero pactorum, et contractuum,
quorum pars potior in
rerum commutatione versatur,
iura a dominio pendeant,
de hoc prius, et officiis,
cum eo connexis exponendum
mihi esse arbitratus sum,
quam eam tractationem
adgrederer.

§. 49.

Proprietas rerum cur inducta?

Rerum usus in principio
communis omnibus, proprietas
nullius fuit. Nihil in
toto hoc terrarum orbe ita
cuiusquam erat, ut non et
alterius esse potuerit, si



modo manum illi prior iniecisset. Itaque omnia omnibus communia fuerunt, donec aliquis rem quampiam occupasset, inque usus suos conuertisset. Ac poterat rerum isthaec communio perpetua esse inter homines, si numerus eorundem id passus fuisset. Verum ex quo genus humanum pene in immensum creuisset, multique essent mortalium ad voluptatem, luxuriam, otium propensiores, quam ad laborem, necessitate factum est, ut ab ea sensim recederetur, inducereturque mos, quo nunc etiam utimur, ut in his rebus, quarum non est tam abundans copia, ut omnibus sufficiant, quin exhauriantur, quod quisque occupasset, id eius ita esset *proprium*, ut ab usu illius, ceteri omnes excluderentur.

§. 50.

Ea introducta, quae nata officia erga alios?

Haec proprietatis, ac dominiorum origo fuit, indeque nati sunt *mei* et *tui*, *proprii* et *alieni* adpellationes. Ex hoc autem rerum, ac iurium discrimine officia permulta proficiscuntur, eaque perfecta, quae

quae alibi *hypothetica* nuncupauimus. Praecipua duabus his regulis continentur *1^{ma}* ut quisque alterum rebus suis quiete uti, et frui patiatur; neue seu vi, seu clam, siue per fraudem, aliaue vlla ratione corrumpat, aut interuertat. Hac lege furta, rapinae, inuasiones, damna, iniuriae, fraudis omne genus prohibentur. *2^{da}*, ut, si quid rei alienae ad nos deuenerit, cuius restituendae facultatem habeamus, nihil praetermittamus operae, quo magis ad Dominum quanto citius redeat. Nam si citra culpam nostram periuit, aut bona fide a nobis absumpta est, nec quidquam ex ea patrimonio nostro augmenti accessit, tum vero ad restitutionem eius nos minime teneri clarum est.

§. 51.

Originarius dominii aquirendi modus est occupatio?

Dominii vero parandi plures sunt modi: *originarii* alii, alii *deriuatiui*. Originarius et antiquissimus modus est *occupatio*: quam nunc quoque in rebus illis, quae nullius sunt, nec omnibus sufficiunt, possiderique, ac defendi possunt, locum habere nemo



dubitat: sed in rebus inexhausti usus, veluti mari, et in iis, quae cuiuspiam ignoranti absunt, veluti amissis, locum non habet. Vnde *inventione* tum demum efficimur Domini, quando rem, quam inuenimus, aut vacuum, aut a domino vere derelictam esse certo constat.

§. 52.

Accessio. Haec quotuplex?

Accessio, qui est alter quaerendi domini modus originarius ab Iure Consultis triplex statuitur: *naturalis* scilicet, *industrialis*, et *mixta*. Triplici enim ratione incrementum rei nostrae accedere potest, vel naturae solius beneficio, vel industria nostra, vel natura simul et industria. Sic foetura animalium naturae soli debetur: soli industriae rebus inducta species, ac fructus terrae plerique naturae simul, et industriae.

§. 53.

Quae regulae circa accessionem?

Quod naturae solius beneficio res nostrae incrementum acceperunt, id quidem
no-



nostrum est, si de priore illius domino nihil constet. Alioquin separandum est a re nostra incrementum, et domino restitutum, vel si commodè separatio iam fieri nequeat, eius praestanda aestimatio. De accessione, quae fit industria nostra, siue sola, siue adiuta a natura, idem pene ius est: nam si, quod rei nostrae ita accedit, alienum non est, erit nostrum, veluti nauis, quam e tabulis meis construxi: sin vero sit alienum, videndum possitne sine detrimento separari, an non, si illud, separabitur, dominoque suo restituetur; sin hoc, res erit pro rata communis, et is, qui communionis auctor existit, damnum, si quod res accepit, praestare tenebitur. Cuncta haec ex illis, quae de non laedendis, aliis diximus, prorsus aperta sunt.

§. 54.

Qui modi deriuatiui?

Sed his quaerendi dominii modis breui adiecti sunt alii, quos *deriuatiuos* Iure Consulti adpellant, et qui nunc inprimis valent: puta successio, tam ex testamento, quam ab intestato, quae etiam *haereditas* dicitur: *praescriptio*, *contractus* etc. Sed

praescriptionem natura nullam nouit. Quare omiffa de vfucapionibus doctrina caeteros persequemur.

CAPVT SEXTVM.

DE CONTRACTIBVS, DEQVE OFFICIIS INDE PROVENIENTIBVS.

§. 55.

Paſſa cur neceſſaria?

Non eſt hoc in noſtra ſitum poteſtate, vt nihil nobis vnquam earum rerum deſit, quae ad vitae neceſſitatem, commoditatemque pertinent. Itaque nullo negotio intelligitur, quae nobis deſunt, ea, quum opus habuerimus, ab aliis petenda eſſe, et noſtra facienda. Et natura quidem huic neceſſitati prouidit, conſtituta inter homines officiorum communione ea, vt alter, alteri, quum poterit, ope, conſilio, rebus ne deſit. Verum hoc dandi beneficii officium imperfectum eſt, quod negari citra iniuriam poteſt, et negatur etiam perſaepe, quod experientia conſtat. Inter eſt autem
no-



nostra frequenter, vt de necessario nobis auxilio certi simus, quod nisi pactis, et conuentionibus ea de re initis effici nulla alia ratione iuste potest.

Officia beneficentiae *citra iniuriam* negari posse quod dixi, caue sic intelligas, quasi nefas non sit ea negare indigentibus, quum possis praestare. DEVS est, qui nos mutua in beneficia propensos esse vult, promptosque, cuius voluntati parere religionis eius pars est, quam illi debemus, tametsi per vim extorqueri ab inuito beneficia minime debeant.

§. 56.

Quae genera pactorum?

Sunt autem pactorum, et contractuum variae species. Sed summa eorum partitiō est, in *gratuitos*, seu *beneficos*, et in *onerosos*, seu *reciprocōs*. Gratuiti illi sunt, quibus alteri promittitur quidpiam, sed gratis, nulla vicissim rei cuiusdam praestandae necessitate imposita. Onerosi dicuntur, quibus vtraque pars ad praestandum aliquid adstringitur; hi proinde *bilaterales* sunt; illi *unilaterales*.



§. 57.

*Quid donatio, ? et quae circa illam
Iura, et officia?*

Inest quidem in omni contractu gratuito donatio quaedam, sed est etiam donatio stricte dicta, seu contractus, quo nobis id, quod nullo iure perfecto postulare, atque exigere poteramus, gratis, et ita tribuitur, ut nostrum fiat. Itaque res donatione efficitur nostra, nec vlla est eius, quod semel donatum est, repetitio, ne quidem ob ingratitudinem donatarii. Quoniam vero a donantis voluntate pendet, quo modo, aut qua lege donare velit, nihil impedit, quominus conditionem etiam aliquam adiungat, veluti si se ante donatarium obire contingat, quae *donatio mortis causa* dicitur: et in eo maxime a donatione inter vivos distat, quod ante mortem pro arbitrio donantis reuocari possit, nec nisi confirmata morte ius perpetuum, et irrevocabile tribuat.

§. 58.

Quid mutuum?

Proximum donationi est *mutuum*, quo *res*, quae *usu consumitur*, veluti pecunia, vinum, frumentum: et his similia *alteri utenda gratis ea lege datur*, ut certo lapsso tempore, tantumdem in eodem genere reddatur. Creditoris itaque officium est, rem aptam usui praestare, et ante tempus non repetere: Debitoris autem, quod utendum accepit, eo, quo conuenit, tempore ex pacti formula ita reddere, ne quidquam damni adferatur creditori. Distat a mutuo *contractus foenebris*: nam qui mutuum dat, is dat usum gratis, qui autem pecuniam foenori dat, is praeter *sortem*, aliquid pro usu accipit, quod *foenus*, aut *usura* dicitur.

§. 59.

Quid commodatum? et ex hoc quae officia?

Adfine mutuo est *commodatum*. Dico commodatum eum contractum, quo definitum rei nostrae usum alteri ad certum tem-



tempus gratis, et ita concedimus, ut elapso tempore eandem in specie restituere debeat. Quod quia fieri nequit, nisi usus rei citra consumptionem esse possit, commodatum non est praeter quam in rebus non *fungibilibus*. Quoniam autem usus rei commodatae non nisi definitus concessus sit, iniuriam facit commodatarius, dum re aliter, quam concessum est, utitur. Sed nec repeti a commodante, sine iusta causa ante tempus potest. Si res casu perit, perit commodanti; neque enim dominium in hoc contractu transfertur: sin autem dolo, vel culpa Commodatarii factum est, ut intercidat, iniustus fuerit, si neget aestimationem. A commodato differt *precarium* in eo, quod qui precarium rei suae usum concessit alteri, eundem pro arbitratu suo reuocet.

§. 60.

Quid depositum quae officia?

Quod si vero reddendum est cuique, sine detrimento id, quod utendum nobis liberaliter ipse concessit, quanto iustius est restituere, quod apud nos custodiae causa *depositum est* hac ipsa conditione ut,
quan-

quandocunque repetere id visum fuerit deponenti, sine mora redderetur. Vt autem depositarii officium est, rem suae fidei commissam diligenter custodire; ita etiam, qui deposuit impensas in custodiam factas restituere iure tenebitur. Nec postulare aestimationem eius, quod sine dolo, sine culpa depositarii, solo fortunae casu, periit.

§. 61.

Quid mandatum? et quae hinc officia?

Inter contractus gratuitos numeratur etiam *mandatum*, quo alteri quidpiam nostro nomine agendum, curandum, efficiendum committimus. *Mandatarius* igitur, seu quod idem est, *Procurator*, quemadmodum creditum sibi negotium omni diligentia curare, ita nihil, quod mandatum non sit, agere, vel suscipere debet. *Mandans* vicissim quae intra fines mandati a Procuratore gesta sunt, rata habere, eumque seruire indemnem tenetur. Non est autem Procurator, qui rem alienam sibi non commissam agit; sed *negotiorum gestor*: nec continuo mandasse videri potest, qui

qui rem suam, alteriusue alteri *commen-*
dat, et, ut curae sibi esse velit, rogat.

§. 62.

*Quae in contractibus onerosis regulae
generales?*

De contractibus *onerosis* hoc généra-
tim tenendum est: omnem in illis inaequa-
litatem a naturali iustitia alienam, et ob
id illicitam esse: quia vero in statu naturali
suis quisque rebus pretium pro arbitrio
statuit, aequalitas rerum permutandarum
a voluntate, et iudicio contrahentium
ita pendet, ut aequales sint, quas esse
tales censent contrahentes. Ceterum,
quia in hoc iudicio falli eos necesse est, si
latentia rerum vitia studiose celentur, con-
tra viri boni, ac iusti officium facit, qui
quae suae rei vitia nouit, fileat, ut incau-
tum decipiat.

§. 63.

*Quid permutatio? et quae permutan-
tium officia?*

In onerosis contractibus principem lo-
cum tenet is, qui fit *permutatione*: id
est

est accipiendo, quo egeas, et dando, quo carere queas ipse; alter vero usus sibi fore putet. De quibus dandis, recipiendisque posteaquam conuentum est inter contrahentes, perfecta est permutatio, statimque ad ea mutuo sibi tradenda obligat. permutari vero posse, non res modo cum rebus, sed, et usum rei cum usu rei alterius, operas item cum operis prorsus apertum est.

§. 64.

Quid Emtio? Venditio?

Est hoc genus contrahendi procul dubio antiquissimum. Sed quum non semper haberet alter, quod tibi usui esse posset, quodque pro accepto redderet, inuentus est alius, et facilior, et expeditior rerum parandarum modus, qui *emptione*, ac *venditione* perficitur: quod tum fit, quando duo, aut plures inter se, de re certa pro certo pretio tradenda conueniunt: ex qua conuentione nascitur obligatio: *emptoris* quidem; ad pretium numerandum: *Venditoris* autem, ad tradendam mercem, praestandamque euictionem, si rem alienam pro sua incio emptori obtrusisset:

vtri-



utriusque demum ad seruanda pacta, si quae contractui praeterea adiacere placuit, cuiusmodi sunt pacta: de retrovendendo: praelationis, legis commissoriae, additionis in diem, et alia similia.

Pactum de retrovendendo est conuentio de re vendita, pretio ante, vel post certum diem, vel quandocunque restituto, venditori reddenda. *Pactum praelationis* est conuentio de re iterum venali venditori potius, eiusue posteris, tandumdem pretium, quod alii offerunt, soluentibus vendenda. *Pactum legis commissoriae* est pactum, quo venditor rem inemptam fore cauet, si pretium ante certum diem non soluatur. *Pactum additionis in diem*: est pactum de emptione venditione, seu perficienda, si intra certum diem, nemo plus obtulerit: seu iam perfecta rescindenda, si plus oblatum fuerit, nisi prior emptor tantumdem offerat.

§. 65.

Quid Locatio, Conductio?

Non raro fit, vt aedes, praedia, et alia huius generis, alteri vtenda, et fruenda concedamus, idque certo pretio, de quo

quo inter dominum, et eum, cui conceduntur, conuenit. Qui rerum suarum fructum hoc pacto in alium transfert, *locare* dicitur: qui autem fruendas accipit, *conducere*: ipsa conuentio, contractus *locati conducti*: ex cuius natura facile intelligitur, teneri locatorem, vt rem conductori praestet, praestitamque conseruet vsui aptam: vt eam nondum finita locatione ne repetat: vt deteriorationem cum vsu coniunctam ferat. Conductoris vero est, re vti ad eum modum, de quo conuenit: mercedem suo die, sine tergiversatione, ac fraude deponere: nihil negligere, quod ad seruandam rei integritatem pertineat, et si quid sua culpa res vitii accepit, reparare: nam si casu damnum in re datum esset, id quidem Locatori nocet, tamquam Domino, non Conductori.

§. 66.

Quid societas negotiatoria?

Societas, nimirum *negotiatoria*, inter eos esse dicitur, inter quos conuenit de re, vel opera negotiationis causa ea lege conferenda, vt aequalibus, aut rati portionibus lucrum inter se partiantur.

D

Aequa-



Aequales sunt lucri portiones inter socios, qui vel omnia sua Bona, vel aequalem eorum partem contulerunt; sin alius alio plus dedit, ratis portionibus lucrum inter se communicant. Officia vero sociorum sunt, curam, ac diligentiam, quantam quisque potest, in negotio communi adhibere. Omnia ad communem vtilitatem, nihil ad priuatum commodum referre: quod est omnium sociorum commune, id sibi minime vindicare: fraudem omnem fugere: verbo cuncta praestare, quae fides pacti ab vno quoque exigit.

§. 67.

Qui contractus aleae?

Peculiare genus pactorum est, quae *aleam* continent: sunt nimirum conuentiones de incerto euentu, qui lucrum aequae, ac damnum contrahentibus adferre potest; huiusmodi sunt contractus *lusorii*: *emptio spei*: *iactus retis*, *lotaria* etc. Quoniam vero in hoc genere contractuum rarissime euenit, vt, quantum quis praestitit, tantum ab altero recipiat, frustra est, qui in his dati, et accepti aequalitatem desiderat, euentusque spem si destituat, de iniuria queratur, si modo dolus omnis ab-

fu-

fuit, et inter damnum, quod metuitur, ac lucrum, quod speratur, spemque ipsam, ac periculum, iusta quaedam proportio seruetur.

§. 68.

Quibus modis firmantur pacta?

Iam pacti fides sancta quidem esse debet unicuique. Verum docuit non infrequens experientia, eam quoque non raro fluxam esse. Itaque eo iam adducta res est, ut, nisi plane cognitam habeamus, ac perspectam eius fidem, quocum nobis negotium intercedit, pactorum efficacia minime contenti firmari ea velimus, quo de fide ex formula pacti praestanda simus securiores. Id autem 4^{or} fere modis effici solet: *obligatione litterarum: fiducia: sponsione: ac iure-iurando*: Litterarum obligatio, ut hodie mos est, in omni genere conventionum adhibetur: sed eius maior est ad probationem vis, quam ad faciendam de fide securitatem.



§. 69.

Quid est pignus? quid hypotheca?

Fiducia duo sunt modi: alter, quando res paris, aut, quod plerumque fit, maioris pretii datur creditori, ea conditione, ut, si Debitor non soluerit, illa vel iusto pretio sibi retinenda, vel bona fide vendenda suum recuperet, aut sine fraude reddat, si debitor paratam solutionem offerat. Hoc genus *fiduciae* proprie dicitur *pignus*. Alter est modus, dum res quaeque immobilis, veluti fundus, domus obligatur Creditori ita, ut debito non soluto, ex ea sortem, una cum foenore recipiat. Rem in hunc modum obligatam vocant *hypothecam*.

§. 70.

Quid fideiussio?

Sponsio, quae *fideiussionis* nomine notior est, in eo est sita; si Debitor, qui, quod obliget, aut pignori det, non habet; dato pro se fideiussore, caueat. Dicitur vero Fideiussor, qui, si Debitor solvendo non foret, se soluturum spondet, quod ille debet. Vnde aliud est, *fide iurare*: aliud *expromittere*.

§. 71.

§. 71.

Qui Iusiurandum?

Iurisiurandi demum religio persaepe ad firmandam pactorum fidem adhibetur, quae hoc maiori integritate exoluenda erit, quo grauius scelus est DEVM velle, quam hominem fallere: siue enim falsum sciens iures, siue iurata fallas fidem, blasphemiae reus es, quo crimine nullum esse potest magis abominabile.

CAPVT SEPTIMVM.

DE SVCCESIONIBVS SECVNDVM IVS NATVRALE.

§. 72.

Quid Successio, et quotuplex?

De acquisitione Bonorum *per successionem*, quaedam dici quidem etiam ex iure naturali possunt multa non possunt. Successionum enim iura pleraque institutis humanis originem debent: his autem quid constitutum sit, ex legi-



bus cuiusque Regni propriis descendenda erit. Sunt vero Successionis genera tria praecipua; ea scilicet, quae *legitima* dicitur: tum ea, quae ex *testamento* deferatur: demum *paëtitia*: quae his modis adquirimus, *haereditate* accipimus, et is, in quem ita post mortem alicuius Bonae transferuntur, vocatur *haeres*.

§. 73.

Quae Successio legitima?

Successio legitima praesumpta voluntate defuncti nititur. Huius autem praesumptionis ea ratio est, quod, qui res sibi tanta sollicitudine, quaerunt, quaesitasque tanta cura conseruant, et administrant, eorum, ut facile creditu est, non ea sit intentio, ut se mortuis veluti vacuae cuius occupanti cedant, sed ut suis, quos amant, et quorum felicitate delectantur, prosint. Quoniam vero natura cuique insitus sit amor eorum, quos ex se genuit, et qui nobis sunt iuncti necessitudine, aliorumque cognatorum; haut aegre intelligitur, morientium desideria alia non esse, quam ut, quae sua sunt, his cedant, ut quisque eorum sibi necessitudine coniunctissimus esset.



esset. Coniunctior autem nemo cuiquam existimari potest, quam sint Liberi Parentibus, ac vicissim: hos itaque non immerito natura priore loco ad successionem vocat: tum fratres; ac sorores, horumque Liberos; postremo cognatos; nullo sexus, atque aetatis discrimine. Quod enim quibusdam in locis mares foeminis, maiores natu minoribus praeferruntur, id vero ex lege civili, et hominum inuento est, non ex iure naturae.

§. 74.

Quid testamentaria?

Sed si cui Liberi nulli sunt, nulli alii, quibus ex iustitia, siue aequitate Bona relinqui debeant, non videtur ei neganda potestas designandi, quem maxime sibi post mortem in illis successorem cupiat, nisi viuens ipse sententiam mutasset. Sane causam non video, cur, quae Dominus, dum viueret, recte, iusteque de bonis suis constituit, post mortem valere non debeant. Huiusmodi voluntatis declaratio *Testamentum* dicitur: cuius ea vis est, ut Bona defuncti, non possint tanquam in medio posita existimari, quae ab vno quoque occu-



pari queant: sed sint tamquam iacentia, a quibus adprehendendis citra iniuriam non possit arceri is, cui prae aliis omnibus illa Testantis suprema voluntas addixit.

§. 75.

Quid pactitia?

Neque ego aliena a naturae iure censeo *pacta successoria*: quamquam ea ius Romanum non prober, plenaque tristissimi euentus queratur. Quum enim, quod nostrum est, de eo nobis non modo in praesens, sed et in futurum disponere integrum sit, nihil est profecto, quod impediat, quo minus nobis etiam pacisci de Bonis in euentum mortis in alterum transferendis liceat. Nam ratio de voto captandae mortis in haec pacta non magis cadit, quam in *Donationes mortis causa*, quas tamen Romani non improbant.

§. 76.

Quae Successoris officia?

Siue autem Testamento, siue pacto de successione in Bona sua statuat Dominus, ab
eius



eius pendet arbitrio qua lege, quae conditione: ex asse? an pro parte: reuocabili, an irrevocabili iure etc. ea ad heredem transire velit. Multa hic quidem civili lege aliter constituta sunt; sed huius subtilitates non patitur naturae simplicitas.

§. 77.

An heres teneatur oneribus defuncti:

Id vero aequissimum est: ut haeres, seu is lege, seu diserta Testantis voluntate succedat, posteaquam semel adire haereditatem constituit, quemadmodum iura defuncti omnia, quae morte extincta non sunt; ita etiam onera illius sua esse putet, obligationibusque tamquam suis satisfaciat, quantum, quae accipit Bona, sufficiunt.

CAPVT OCTAVVM

DE IVRE HOMINVM SOCIALI.

§. 78.

Quid societas pro statu accepta?

Societatis nomine hic *statum* intelligo
hominum communis cuiusdam finis ad-



piscendi gratia inter se unitorum. Habet igitur omnis societas finem quempiam, eumque bonum sibi propositum, ad quem coniunctis viribus contendat. Qui quidem finis, quum varius esse queat, societatum quoque varia posse genera constitui planum est.

§. 79.

Quae sociorum officia generalia?

Omniū vero societatum, cuiuscunque illae sint generis, hoc est commune, ut sint Personae quaedam morales: nimirum, qui in societatem quampiam coeunt, in hoc omnes conspirent necesse est; ut se mutuo in his, quae ad finem, cuius gratia coierunt, pertinent, iuuent, ac defendant. Ut enim naturalis personae salus inde existit, si partes eius omnes in vnam veluti harmoniam conspirent; ita ex concordia in eundem finem, eademque media, conspiratione eorum, qui societatem constituent, salus et nascitur, et conseruatur. Ita omnium, qui in societatem coierunt, quasi vnus debet esse intellectus, vna voluntas; ex quo lex omnium in omni societate suprema orta est: quae ad omnia ea agenda,
sine

sine quibus finis, quem societas intendit, obtineri nequeat, contra ad ea omnia, quae fini societatis aduersantur omittenda Socios obstringit.

§. 80.

Quae Societas coniugalis?

Prima, atque omnium simplicissima est societas, quae existit ex vnione maris, et foeminae per legitimas nuptias contracta. Coniugum aduersum se mutua officia, virtutesque sunt: *viri* quidem prudentia, mansuetudo, lenitas, vigilantia, animus fortis: *mulieris* autem castitas, fides, modestia, pietas, obedientia.

§. 81.

Quae Parentum, ac Liberorum?

Proxima huic est Societas, quae Liberos Parentibus coniungit, et cui educatio Liberorum, rectaque institutio proposita est. Officia itaque Parentum erga Liberos sunt imo hos amare, non stulte deperire. 2do educare honeste, quod quidem fit non alimentis dumtaxat praebeendis, colendoque

corpore, sed cumprimis recta intellectus, ac voluntatis institutione. 3io *In veritatibus religionis, solidaeque pietatis adcurate instruere*, non tam verbis, ac cohortationibus, quam exemplo vitae ad imitandum proposito. 4to castigare, dum res ita exigit, sed ad modum. 5to non adplaudere vitiis infantiae. 6to Nec ingenium putare stultam, et immodestam pueri loquacitatem. 7mo adfectibus modum adhibere, ne in perniciem eius adolescant. 8uo cauere, ne quid vnquam mali, seu inhonesti facere iubeantur. 9no In necessariis nunquam deesse. etc. Liberorum autem erit tenerrimo parentes amore complecti, eumque quauis data occasione testari: eos reuereri: obedire illis in omnibus, quae legibus non sunt aduersa: consulere necessitatibus eorundem: nihil, quod iusta de causa displicere queat, agere: multoque minus quidquam committere, quod rebus eorum., vitae, corpori, aut famae noceat.

§. 82.

Quid societas herilis, et quae huius officia?

Educandorum Liberorum, et instituentorum: totiusque familiae regendae, atque curan-



curandae necessitas alienam saepe operam desiderat. Haec causa *Herilis societatis* prima fuit, quae *domini*, aut *serui herae*, atque *ancillae* ignota naturae nomina inuenit. Ut autem seruorum est amare heros, eosque reuereri, iustis eorum, atque honestis mandatis prompte obsequi, rem sibi commissam diligenter, ac bona fide procurare: ita suum Domini officium esse nouerint, aequitatem seruis exhibere: ut ait *Paulus Apostolus*, nihil nisi iustum, et aequum, nihil nisi honestum praecipere: quae ad victum eorum, ac vestitum pertinent, humaniter suppeditare: vitae ad verae pietatis normam exigendae rationem docere: labores ab iis ad suum modum exigere: iusta mercede non defraudare; eos morbis, aut aetate fractos non abiicere; et in castigando meminisse homines eos esse sibi natura non impares, dominiumque in eos se exercere, verum ita, ut rationem eius olim reddituri sint DEO tamquam communi ipsorum, ac seruorum domino, quemadmodum docet *PAVLVS in epist. ad Epbes. III.*



§. 83.

Quae societas civilis? quis eius finis?

Sed humanarum societatum omnium, ut maxima, ita praestantissima est *Societas civilis*, in quam ut coirent segreges familiae, partemque libertatis naturalis a se abdicarent, studium fuit *propriae securitatis*, quam in tanta hominum improbitate, habendique insatiabili quadam cupiditate facile prospiciebant sine communi quodam imperio, intutam valde, aut potius nullam fore. Hominum itaque in civilibus societatibus viuentium alii quidem sunt, qui imperium summum tenent: *Principes*: alii qui horum vice in publicarum rerum administratione funguntur *Magistratus*: alii denique *Subditi*.

§. 84.

Quae Imperantis?

In his, penes quos est imperandi in ciuitate potestas summa, duo sunt caute discernenda: *Persona* scilicet, quae imperium exercet; & *Iura* quibus illud exercet: namque personae ad imperium designatio popu-

li est *originarie*, eiusdemque est definire non tantum *modum*, quo imperium deinceps iuste adquiri possit; verum etiam eius administrandi *formam*. Sed iura, quae insunt in imperio, ea quidem ex ipsis naturae fontibus profisciscuntur, diuinaeque sunt originis: quo fit ut in huius generis iuribus exercendis summi Principes soli Deo subsint, nulli vero alteri mortalium; ut in eorum exercitio a nemine possint impediri; nulli teneantur praeterquam Deo rationes reddere; ut resistere illis nefas sit. *Qui potestati resistit* inquit *Paulus Apostolus DEI ordinationi resistit; non est enim potestas nisi a DEO. ad Romanos cap. 13.* Ut autem iura summo imperio comprehensa prorsus eximia sunt: ut sancta, atque eminens Principum Maiestas; ita etiam sancta, et graua sunt officia, quae his incumbunt, in quorum manu est tot millium temporaria felicitas, quique eius procurandae munus in se receperunt, dum imperium reciperent.

§. 85.

Quae reliquorum Ciuium officia?

Non minus graua sunt erga Principem suum officia subditorum 1^{mo} eos honorare
tam-



tamquam qui Dei in regendis rebus publicis vices obeunt in his terris, quo tranquilla, ac beata mortalium vita esset. 2^{do} *amare* eos, ac *reuereri*, vt Patres populi. 3^{io} *Iis obedire* in omnibus, quae naturae non obstant, nec aduersantur Legibus: *obedire autem non tantum propter iram, sed etiam propter Conscientiam.* 4^{to} *Iis praestare tributa*: quod idem, quem saepe commemoravi, *Paulus Apostolus* praecepit. 5^{to} *Fidem non fallere*, non fouere seditiones, non aliud quidquam committere, quod esset contra id, quod Principi debent, obsequium. 6^{to} *Præcari DEVM pro Iis non bonis tantum, verum etiam discolis* exemplo veterum Christianorum quos Apostolici praecepti memores precatos fuisse DEVM *Tertullianus* refert etiam pro Iis Romanorum Imperatoribus, a quibus nihil factum est reliqui, vt nomen Christianum penitus deleteretur.






24

⑥

16/2/7



K


Institutio elementorum iuri
naturalis in usum gymnas

I5994

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

UTL AT DOWNSVIEW



D RANGE BAY SHLF POS ITEM C
39 09 13 05 05 001 9